

羅頌物原

嘉靖二十四年李憲刊於

貴州銅仁府截園老人記

物原叙



羅頤曰大哉聖人開物制器之功也
後之人樂其樂而利其利可不知所
本乎及乎升世機智荐增創設非儀
然亦不可不識也此昔人事物紀原
之所以作焉然予猶病其不能黜妄
而宗真以致辭繁而靡衰故更泛訂

羣籍作爲此書其類十有八一日天
原二曰禮原三曰名原四曰樂原五
曰政原六曰官原七曰資原八曰刑
原九曰文原十曰食原十一曰衣原
十二曰室原十三曰地原十四曰兵
原十五曰技原十六曰葬原十七曰
器原十八曰事原其餘二百三十有

九總名曰物原以著古人開物之有
漸俾其旨支分而派布昭然若示諸
掌以正舊譌并所缺焉雖曰文之不
腴抑亦語簡而易知矣昔成化十年
歲次甲午春二月下弦日也

物原目錄

天原第一 凡八條

禮原第二 凡二十五條

名原第三 凡二十五條

樂原第四 凡六條

政原第五 凡二十五條

官原第六 凡三十八條

資原第七 凡四條

刑原第八 凡四條

文原第九 凡十四條



食原第十 九十條

衣原第十一 九十一條

室原第十二 九四條

地原第十三 九六條

兵原第十四 九六條

技原第十五 九十二條

墓原第十六 九四條

器原第十七 九二十九條

事原第十八 九六條

物原目錄終

物原

天原第一 九八條

山陰核軒羅頤輯著
山陰思齋朱麈校正
南海鼎溪李憲重刊

伏羲始畫卦以造天圖而起數周文王演為後天圖
而作易漢焦贛始推卦氣揚雄始演太玄宋周茂
叔始造太極圖

伏羲始造龜卜神農始以著筮漢張良始造棊卜京
房始以錢卜王遠知又制玄女課宋邵堯夫始制

拆字及觀梅卜

伏犧始造干支甲子周公作納音漢項仁作六甲推
占法遂人始觀星辰伏犧制造星官推步作蓋天
分周天爲三百六十五度以占日月星辰軒轅因
使容成造授時曆設占風雲望氛占歲擇日及遁
甲諸法堯作渾天周公作占夢法漢東方朔始以
正月上旬內八日占鷄狗羊猪牛馬人殺之吉凶
伏犧始辨五氣爲四時爰分陰陽辨晝夜神農始分
八節辨弦望晦朔軒轅始以百刻爲日分年月日
時元會運世以十二月配十二辰制五運六氣之

說堯以閏月定四時而成歲周公以三十六禽配
二十八宿始分二十四氣七十二候

伏犧初置元日神農初置臘節軒轅初置二社巫咸
始置除夕節周公始置上巳秦德公初置伏日晉
平公始置中秋齊景公始置重陽端午楚懷王初
置七夕秦始皇初置寒食漢武帝始置三元東方
朔初置人日唐李泌始置中和節

夏禹始置九疇箕子作洪範周公乃按其法作明堂
始謂之九宮宋蔡淵始演皇極數

遂人始觀斗極而定四方伏犧始置土圭以測景因

定十二支方位神農始察土宜辨水性以定民居
軒轅遂相山川分地域此風水室土二家之本也
伊尹始制水平法而建表以辨方周公制二十四
向漢王況始制五音宅姓魏管輅置格盤始擇葬
地

禮原第二凡二十五條

伏犧始定人倫列五品制九族正姓立宗為君義臣
忠父慈子孝兄愛弟敬夫和妻柔男女有別朋友
有信九族睦婣之方軒轅始設隣里鄉黨使相矚
恤至秦商鞅變其法始有分居贅婿之俗相收司

連心之律

遂人始有婦伏犧始制嫁娶周公始令同姓不婚及
制婚姻六禮

伏犧始制飲食之禮軒轅始制養老之禮唐堯始置
燕享之禮舜始為脰膳慶弔之禮禹始為鄉飲大
飲烝之禮

軒轅始為軍禮顓頊始制大田四時獵禮周公始制
射禮

唐堯始為冠禮周公制三加

伏犧始制朝聘軒轅始為巡狩

軒轅始制男贄玉帛禽鳥女贄榛栗棗脩禹始制進
貢方物

伏犧始制拜揖周公始分九拜唐武后始制女拜不
跪

古者天子每日視朝必居明堂四時各以其方位閏
月則居門秦始廢古制每五日一入閣聽事百官
起居正衙立仗

古者天子朝諸侯南面而立秦始制御床而坐
古者三公與王坐而論道秦始制立侍之禮漢制賜
大臣坐則開宣室此後世賜坐所由起也

古者卿大夫退朝則歸于家無日夜待命臺寺者秦
始制抑臣之禮制公卿非五日一休沐則不敢歸
舍

伏犧始享神祇創為圓丘方澤二郊神農始創稊蜡
軒轅始祭社稷山川少昊始祭先農先蠶顓頊始
為表禡之祭帝嚳始祭日月星辰寒暑四時風雲
雷雨舜始類祀上帝及釋奠釋菜五嶽四瀆四方
百物之祭禹始大旅上帝及祭司寒冰神商湯始
祭五祀周公始祭司命秦厲秦德公始祀伏秦始
皇變古制始行封禪王莽始合祭天地唐玄宗始

祭九宮神

伏犧始郊祀皇天后土神農始大享五天之帝於明堂堯始以五人帝及五神配享舜始置五郊迎氣各祭其方之天帝湯始置雩以四月總祭五帝於南郊周公始以建寅之月祭感生帝於南郊建申之月祭神州地祇於北郊

湯以戶竈中雷門行路爲五祀周公加厲戶司命爲七祀漢高祖始廢戶而祭井

伏犧始祭天于郊神農加明堂祀舜始以鬯配郊殷湯始以始祖配郊周公始以禰配明堂

伏犧始祀其先少昊始作宗廟設四時之祭舜始作禘禹始制七廟行禘祭帝槐始制不遷宗祭法殷太甲始以功臣配享于廟

軒轅始造壇墀左徹始制祠廟伊尹始作木主唐玄宗始造享廟牙盤

伏犧始爲資父事母之教軒轅始制喪禮其期無數唐堯始定制父喪斬衰三年父在則爲母齊衰期月父亡服母喪齊衰三年夏禹又推設五服定其輕重之差巫咸制招魂周公制庶子父及嫡母在爲所生母服齊衰三月魯公伯禽始制金革無避

晉襄公始壞喪制為起復魯昭公始制慈母服漢文帝始短喪為易月之制唐武后始制父在行母喪亦齊衰三年

周武王始制追王之禮晉文公始制追封之禮

唐堯始制天子諸侯遇災喪則避舍減食輟朝撤樂之禮夏少康始制天子諸侯決重囚則減食撤樂之禮伊尹始制勝國之君忌日則王公卿士並撤樂梁武帝始制斷屠日唐高祖始制斷屠日不行刑

公劉始制下人以酒壽上之禮楚優孟始制臣見君

稱萬歲漢武帝始制呼萬歲必三聲謂之山呼魏

宣武始於天子生日設僧齋唐玄宗始制聖節

遂人始作樵漁伏犧始置牧獵史卜神農始作農工

醫賈軒轅始設奴婢佃戶園丁日者

伏犧始作媒以交男女作介以交朋友女媧始作巫

祝以交神人神農始作僧以通銜售軒轅始作保

以通假貸少昊始作謁以通君臣夏禹始作譯以

通夷夏

漢文翁始以文學化蜀民錫光始以禮教化嶺南蠻

唐常衮始以文學化閩人

名原第三 凡二十五條

伏羲始定名百物始稱天地為乾坤辨日月星辰為四象神農始定嶽瀆及諸地名軒轅始定五行二十八宿十二次及九州萬國之名禹始定大山川名周公始稱天地人為三才

伏羲始制人倫鳥獸之名神農始制土石草木之名軒轅始制衣食宮室器用人事之名

凡遠始有人號伏羲始制人姓名軒轅始建國號舜始置廟號周公加字與謚死而諱其名元魏孝文始定氏族郡望

自軒轅稱國號始加有字曰有熊是也至漢武帝稱國號改加大字曰大漢是也及元人稱國號又加以皇曰皇元是也

自軒轅稱國號咸因所起地名至女直入據中國無以稱其所起始緣義以建號曰大金

凡國名稱氏自伏羲始至商則改而稱人古者貴賤通稱曰朕周天子自稱曰余一人秦始皇始制天子自稱曰朕

遂人始稱皇少昊始稱帝禹始稱王商人始稱天子周穆王始制稱堯為皇帝孔子始稱王為天王漢

人始稱天子為官家司馬遷始稱天子為上晉人始稱天子為大家

秦李斯始制天子尊號唐代宗始賜功臣號宋真宗始制道家尊號

徐偃王始僭稱王楚申縣尹闔般始僭稱公吳伯嚭始僭稱太宰

戰國之時貴賤通稱皆曰足下秦漢始稱天子為陛下太子諸王為殿下將為麾下使為節下公卿牧守為閣下父母為膝下師傳為講下婦人為簾下惟比肩稱足下

古者貴賤通稱其妻曰妃周公始稱天子妻曰后妾曰夫人諸侯妻曰夫人卿妻曰內子大夫妻曰命婦士庶人曰妻王公世子曰太子秦昭王始稱其母曰太后漢高祖始稱其父母曰太上皇諸侯母曰太夫人武帝始稱其祖母曰太皇魏明帝始稱天子妾諸王妻並曰妃晉哀帝始稱所生妾母曰太妃

周宣王始稱其女曰公主諸侯女曰翁主魏文帝始稱主嬙曰駙馬唐太宗始稱諸王女曰郡主諸侯女曰縣主

凡諸官稱師自伏羲龍師始諸官稱吏亦自伏羲置
史官始諸官稱監自軒轅置左右太監始諸官稱
正自顓頊置南北正始諸官稱司亦自顓頊置司
徒始諸官稱大夫自堯設司徒屬大夫始諸官稱
典自舜命夔典樂始諸官稱大稱少自商湯設太
傅少傅始諸官稱令自楚若敖置令尹始諸官稱
尉自晉武公置軍尉始諸官稱丞自秦獻公置丞
相始諸官稱郎自秦武王置常侍郎始諸官稱事
自秦始皇置給事始諸官稱使自漢武帝置都水
使始諸官稱知自後魏太武置叅知政事始

軍官稱都督自漢光武置督軍御史始稱指揮使自
唐僖宗以左右神策軍大將軍為左右神策軍都
指揮使始

漢光武初以御史督軍謂之都督魏明帝遂稱大將
軍為都督唐高祖又稱州牧為都督

漢成帝始稱方伯為州牧亦因唐虞制也後周改稱
總管唐改稱都督元改稱平章今為布政使

漢文帝初置刺史唐中宗改稱巡察使睿宗改稱按
察使玄宗改稱采訪使肅宗改稱觀察使宋改稱
提刑元改稱廉訪使

秦始皇始稱京郡守為內史漢景帝始稱王國守為
內史武帝改稱京郡守為尹成帝始稱王國守為
相隋始稱郡守為刺史宋太祖改稱知州高宗改
稱知府元改稱總管

晉劉淵始稱華人為漢子桓玄始稱俗人為獠子

商人始稱帝都為京師楚文王始稱邑為縣漢武帝
始稱巷為坊宋太祖始稱里為保今稱保為圖鄉
為都

漢武帝始稱州為部唐太宗改稱道宋太祖改稱路
元世祖改稱省

隋文帝始稱郡為州唐玄宗始稱州為府元世祖始
稱府為路秦稱御史署曰府漢明帝始稱憲臺今
曰院

漢謂丞相將軍御史三府為三司唐始謂鹽鐵度支
戶部為三司今始謂大理刑部都察為三法司都
指揮布政按察為三司

樂原第四九六條

伏犧始作樂而辨五音其臣葛天制歌陰康制舞軒
轅臣伶倫始定律呂

伏犧始作琴瑟女媧加之以笙竽神農加以鍾鼓軒

物原
較使伶倫作笛毋句作磬帝嚳作埙篪祝融堯作
笙舜作簫此為雅樂之器紂使師延作笙篪老聃
作胡笳秦蒙恬造箏漢烏孫公主作琵琶晉阮咸
作阮宋識作拍板梁武帝作響板此為俗樂之器
伏犧始作五絃琴周文武各加一絃為七絃琴此為
雅琴晉孫登作一絃琴嵇康作嵇琴梁柳惲作擊
琴此為變調

神農作鍾軒轅臣榮拔作罇鍾禹作鐸湯作鐸
神農作鼓帝嚳作鼗禹作鞀及篥簾

伏犧始制旄舞軒轅始制干羽以舞戰國始制執拂

如意之舞

政原第五 九二十五條

遂人始為教令伏犧始立正朔而建子軒轅始定服
色秦惠王始重政元漢武帝始立年號

伏犧始以木德王鄒衍始推五德之運漢劉向始推
五德生勝有正閏之辨

遂人始立朝廷伏犧始建都立家軒轅因造城郭溝
池街巷堯始立巷牌

遂人始立教臺神農始作明堂軒轅始作靈臺舜加
辟雍禹作冀闕周公始備九門

神農始以日中爲市而立廛湯始設關周公始制關
市之征管仲始稅魚鹽齊景公始置山海池澤園
林之稅漢文帝始稅酒武帝加稅商舟車皮鐵糟
醋及契本唐太宗始稅草趙贊始稅竹木茶漆裴
延齡始爲和買

管仲始稅鹽漢桑弘羊始禁私鹽而官賣唐元宗始
給商貨引

舜始立學魏曹芳始以顏回配孔子于辟雍唐高祖
始立孔子廟於學太宗加以先賢配享

軒轅始制圍以爲演武場唐太宗始立呂望廟以古

名將配享武后始制武舉宋仁宗始制武學

周公始立貢士法漢文帝始置賢良科武帝始置茂
才孝廉明經三科漢宣帝始置童子科隋煬帝始
置進士科

漢文帝始以策試取士武帝加問經疑左雄加章奏
梁武帝始以詞賦唐太宗加律判及詩德宗加論
及詔誥

漢武帝始設殿試唐太宗始設鄉試會試武后始彌
封中宗初分三場玄宗始令禮部知貢舉宣宗始
置登科錄唐明宗始印卷宋太宗始唱進士名分

為五甲而賜燕及置試院巡緝監門官真宗始印
題

神農始制儀仗用斧戟鞭笏軒轅始制出警入蹕設
侍衛執鉞二人執櫪十人謂之虎賁卽今鎮殿將
軍力士也漢武帝始制障扇十二把晉武帝制班
劍白幹鎗元帝加儀刀御刀

軒轅作鉞秦始皇改為鐙

漢武帝始制雉尾扇以障御容宋孝武始制朱團扇
以障侯王

周公始制五輅載太常以記里指南二車前導作鈸
為侍衛有屬車十二乘呂望加曲蓋晉文公制左
右虞候以掖駕秦始皇初作鹵簿三駕為金根車
上施華蓋相風鳥設辟惡車前導定制大駕屬車
八十一乘法駕三十六乘小駕則因周之舊漢武
帝益以憶弩金五鸞旗車皮軒車設黃鉞車左右
旄節十六竿畢二旗前後黃麾睥睨蓋并御馬分
左右為羽儀其屬車最後一乘懸豹尾本周置自
豹尾以前為省中晉武帝始制五牛輅赤青二麾
以為羽儀後魏孝文益以皂纛為羽儀隋文帝益
以白鷺車為前導設鍾鼓行漏車為羽儀唐高祖

加以腰輿大駕先五輅制香鑿輦芳亭鳳輦爲羽
儀玄宗加以毬仗宋陶穀始制駕頭法座十二神
輿操稍勘箭方傘大傘及天王負圖方歲太平玉
兔金鸚馴象獅子五龍五鳳左右攝提日月五星
北斗二十八宿十二辰風雨雷電合璧連珠六大
神五嶽四瀆五方之旗各一苜文祥雲旗各二
遂人結繩而治伏犧始造書契秦始皇始制天子行
文曰詔臣下稟事之文曰奏漢文帝始制諸王行
文曰教景帝始制諸司行文曰移上行下曰牒光
武始制稟事王侯曰啓唐太宗又制諸司咨文曰

關

軒轅初設符驗周公制三節及印璽北齊高洋作條
印唐韋陟制押字

堯始制諫鼓謗木禹益以鍾鼓磬鞀鐸以求言漢趙
廣漢始作鈛笳梁武帝始作甌

管仲初制平糴法漢耿壽昌爰立常平倉後魏李崇
始置巡警鋪北齊高湛始置義倉唐玄宗始置養
濟院

周公遷殷頑民於洛邑此後世筮取富戶之始周穆
王始令民以錢贖罪秦始皇始令民納粟買官唐

楊國忠始令民納粟度僧

伏犧始統萬國軒轅始分九州裂土以封建堯始分五爵禹始置五服秦昭王始封爵以戶秦始皇始并天下因六國之制設為郡縣漢宣帝給侯以俸不實封魏文帝始以鄉亭封公侯郡邑封王公矣軒轅始置封建舜始制世祿

堯始考功後魏崔亮始限年

軒轅始給官吏胥徒俸及賞賜周公始置恩例漢文帝始給太子櫝食唐太宗始給常朝官廊食武后始借賜下官緋紫德宗始折俸

軒轅始設戶口圖籍周公始置租庸調及蠲役法秦始皇始制帮役法北齊高澄始定九等戶役為均徭其不點差者令納庸布此宋丁錢所起也

官原第六 九三十八條

伏犧始立百官堯始分大夫士為五等周公始設九命異賜又制人為十等田襄子始分文武異任商鞅始置資級魏陳郡始分九品後魏始定九品正從每品分上下階蘇綽始分士途為二流

商湯始設公孤秦始皇始以丞相太尉御史大夫為三公其署謂之三司亦曰三府至漢武帝改太尉

為太司馬成帝改御史大夫為大司空哀帝改丞相為大司徒是以周之三卿為三公矣其失自秦始也

伏羲始置二相又任襄英為左右若唐虞之百揆商之太宰周之冢宰皆相職也至秦獻公始稱丞相莊襄改稱相國至漢武帝不以朝政付宰相始置尚書令典樞機其任蓋猶羲皇之襄英周官之卿士也武帝崩霍光以太司馬當國領尚書事於是遂以大臣領尚書而大司馬之職班宰相上尚書令之權重於宰相矣至成帝始以特進張禹錄尚

書事蓋以三公下兼卿士之職也自是遂以錄尚書為首相之稱矣靈帝始以宰相胡廣為太傅自是遂以大傅為首相之稱至魏文帝以中書令晉武帝以尚書令宋文帝以侍中並始為相職北齊始置尚書行臺此宰相初有分司也隋文帝始以侍中中書令為上相僕射為次相唐太宗因後魏制以他官行相事謂之叅知政事同平章事同中書門下三品其後遂俱以為直宿之稱中宗又置平章軍國重事則古三公兼宰相之職也玄宗改侍中稱黃門監宋神宗之以尚書左右丞為執政

官徽宗加宰相太師之稱自是首相多稱太師元世祖始制參議官及中書行省行省卽北齊行臺也

國朝洪武中始罷丞相不置尋又以文淵閣掌機密蓋卽漢尚書令之職位雖五品而實統百揆焉

唐太宗始以宰相監脩國史唐莊宗始以平章事兼樞密使謂之使相

周公置常伯至秦始皇改令丞相史典殿中章奏謂之侍中而置黃門郎散騎二官與中常侍爲之副黃門郎亦曰給事其中常侍散騎則或以寺人爲

之自是侍中屬僚參用士寺二流矣後漢稱黃門郎爲侍郎至靈帝始置侍中寺魏文帝合散騎常侍爲一官而改用士人又分侍中太僕之職置殿中監自是士人給事者居侍中寺黃門令中常侍諸寺人則皆居殿中監晉武帝始改侍中寺稱門下省亦曰北省至宋文帝遂以侍中爲相職隋文帝改侍中稱納言唐玄宗始改門下省爲黃門省侍中改稱監

顯頊始置納言周公改稱內史秦始皇中書謁者特官甚卑不置令漢武帝始置中書令領尚書事尚

以寺人爲之置丞郎爲屬位雖卑而權已重矣成
帝始易任以士人魏文帝始立中書省稱中書郎
爲侍郎其屬添置都通事晉武帝始設中書舍人
隋文帝復中書令稱內史唐裴炎始置政事堂於
中書省凡三省官議政必集中書玄宗始以中書
舍人爲知制誥後遂專以知制誥名官宋太祖定
制宰相之府謂之中書省其官有中書令有左右
僕射有門下侍郎蓋兼三省官於中書一省也

周公始置司會秦始皇改令少府史主發行殿中書
謂之尚書已蓋卑員漢武帝始置尚書令以統諸

尚書及屬郎與中書宦官共典樞機其任遂與周
之卿士相並矣至成帝又設僕射及左右丞爲尚
書令屬置尚書臺僕射者本戰國諸侯侍僕射役
之稱秦遂建爲官號而漢於侍中謁者尚書博士
郎等官咸置其員光武又分諸尚書爲六曹各置
侍郎郎中爲之二遂以令僕及六尚書爲八座侍
郎郎中卽屬郎也本秦諸郎趨走殿陛而屬於郎
中令者自漢武帝已置尚書令則尚書諸郎咸不
隸郎中令矣黃門中之有侍郎也亦然晉武帝改
尚書臺爲省亦曰南省遂以尚書令爲相職隋文

帝以令僕係相職不與六曹同乃以左右丞及六曹為八座分屬郎為二十四司各添設員外郎以佐郎中謂之子司隋煬帝又於子司各置主事以副員外主事者本漢吏役之稱武帝於光祿勳置南北庭主事是也後魏始分尚書諸司即置主事令史至隋既定令為二十四司遂去令史之稱但曰主事而已其二十四司吏部四司一曰選曹即今文選司也置自漢之常侍曹二曰封曹即今驗封司也本漢光武因古執秩之官而置三曰勳曹即今稽勳司也本宇文泰因周禮司勳之職而置

四曰功曹即今考功司也亦本漢光武所置戶部四司一曰民曹二曰計曹三曰金曹四曰倉曹並魏文帝所置禮部四司一曰儀曹即今儀制司也本宇文泰所制二曰祠曹即今祠祭司也本魏文帝所置三曰客曹即今主客司也本漢成帝所置四曰膳曹即今精膳司也本晉武帝所置兵部四司一曰武兵曹即今武選司也本魏文帝所置二曰職方曹即今職方司也本宇文泰所置三曰駕曹即今車駕司也四曰庫曹即今武庫司也並魏文帝所置刑部四司一曰賊曹本漢光武所置二

曰都官曹本漢成帝所置三曰比曹亦魏文帝所置四曰門曹本宇文泰所置工部四司一曰起曹卽今營繕司也本漢元帝所置二曰虞曹卽今虞衡司也虞衡本虞書周禮建官三曰水曹卽今都水司也虞水二司並亦魏文帝所置四曰屯曹卽今屯田司也亦本漢成帝所置隋煬帝又設尚士左右司郎中員外以副左右丞謂之都官唐罷尚書令惟設僕射以下官宋神宗升左右丞爲執政左右丞遂居六尚書之上矣高宗罷左右僕射惟設左右丞以下官

國朝盡罷左右丞及都官單設六部其尚書侍郎郎中員外主事之職並仍漢隋舊制惟有戶刑二部事繁乃廢八司舊名各設十三司司名皆按所屬布政之名焉

夏禹始定六卿周公加以殷湯所置三孤謂之九卿夫六卿冢宰之職起於伏犧而銜定于周若司徒司馬司寇則軒轅之雲官司空則少昊之鳥官已並有其職但名銜則起於顓頊之秩宗命以民事爾宗伯之官名雖亦始於周然其職實顓頊之秩宗故六官之職皆創設於唐虞之前而以三孤六

官爲九卿則殷周之制也至秦始皇壞古制乃以奉常宗正郎中令衛尉太僕廷尉典客治粟內史少府爲九卿各置丞以副之而於衛尉置主簿其署則曰九寺漢景帝乃改奉常爲太常廷尉爲大理又改郎中爲光祿勳典客爲鴻臚治粟內史爲司農置光祿主簿成帝始置太常主簿魏文帝始置太理主簿晉武帝始置司農少府主簿梁武帝始置宗正太僕鴻臚主簿後魏孝文又各置少卿太常卽周宗伯廷尉卽周之司寇其爲九卿宜也若宗正則周官小司馬之屬衛尉掌畿卒之官郎

中令蓋諸郎之長太僕亦周官太司馬之屬鴻臚卽周官之大行人治粟內史亦司徒之屬卽少昊之農正也少府乃冢宰之屬無非所以爲九卿也秦之九寺至元罷其四所存惟太常光祿太僕大理鴻臚五寺而已其宗正之職今更爲宗人府令位至一品矣改寺爲府實宋始也衛尉今爲錦衣衛官其職司元置之以代衛尉之任司農少府之職卽自是廢矣

秦始皇初置大理正漢宣帝初置平至隋煬帝稱評事

秦始皇初置太官令太祝令漢文帝始置籍田令陵
臺令武帝始置協律奉禮二郎魏文帝初置太常
齋郎梁武帝始置郊社令

伏犧始置共工少昊更設司空而分其屬爲五工正
秦始皇乃置少府卽共工司空之職也其屬有將
作漢乃分爲二官誤矣至隋又設少府將作軍器
三監抑又誤矣至元始罷將作今又罷少府軍器
二監併其事於工部焉

殷武丁始置御史之職本殿中史也秦始皇始任以
糾察今之都御史卽秦之御史大夫也副都卽其

中丞僉都卽其左右丞散道卽侍御史監察卽其
監郡也

伏犧始設史官武丁始置御史掌祕書卽左右史記
言動者周公始設內史掌出納王命外史掌典文
籍小史掌方國之志秦始皇亦置博士掌故漢文
帝以御史中丞仍掌祕書武帝設蘭臺石渠二署
置太史令掌天文國史卽今東閣學士也又設祕
書令掌祕書卽今文淵閣學士也成帝加校書郎
章帝加祕書郎桓帝加祕書監獻帝加祕書丞魏
明帝加著作郎北齊高洋加正字隋煬帝加祕書

少監唐太宗始置起居郎于門下省高宗又置起居舍人于中書省時謂左右史唐玄宗加脩撰編脩檢討

宋文帝始置學士官唐高祖始置直學士校理以副之高宗始置待制中宗始置大學士玄宗始設集賢翰林二院以爲學士署添置侍讀學士侍講學士侍讀侍講凡所召名儒未授官而於翰林待詔者則稱待詔亦名供奉元改供奉爲應奉唐憲宗始制學士承旨宋真宗始置經筵說書 國初始置五經博士典籍侍書中書舍人於翰林

秦始皇初設諫大夫卽周保氏之職也至唐武后如置拾遺補闕與左右諫大夫並居于中書門下宋太宗始置諫院設知院而改補缺爲正言拾遺爲司諫

顓頊始置樂正以教胄子殷湯始置王世子六傅周公加以庶子秦始皇始置詹事府詹事洗馬家令魏文帝始置侍講舍人北齊分置門下典書二坊卽唐之左右春坊以庶子掌之隋文帝初置中允謂之內允卽今之贊善唐高宗始置賓客諭德率更令玄宗始置少詹事文宗始置侍讀

漢高祖初置諸王傅相中尉傅卽今紀善相卽今長
史中尉卽今護衛也魏武帝加記室晉武帝加文
學宋武帝加侍讀及王友唐文帝始置教授以誨
王之子孫宋太宗置王侍講
學官稱博士祭酒始於戰國至漢武帝始置博士于
京師文學于郡國其博士之長謂之僕射漢光武
改稱祭酒文學卽今府教授也晉武帝始置國子
學設助教北齊高洋加以主簿今日典簿又置正
錄隋煬帝加司業監丞始稱學署曰監宋神宗加
學正學錄及典籍

始設歷正及春夏秋冬中五官時稱龍師其銜
則定於顓頊始命民事也今之欽天監正及五官
正是矣軒轅加以保章挈壺二官漢武帝加以太
史丞卽今監副也光武加置靈臺郎

軒轅始置醫師卽今太醫院使也唐玄宗始置諸州
醫官

周公始置行人卽今行人司官也秦始皇始置公車
令卽今通政使也漢高祖始置符璽郎卽今尚寶
司官也唐太宗始置營幕使卽今儀衛司官也玄
宗始設文思院使及閤門使

北齊高洋始用宮婢為宣徽使唐太宗改用寺人五代時始用士人

唐太宗始以寺人為樞密使朱全忠始置院改用士人唐莊宗始制副使晉高祖設知院周世宗加設同知宋太宗加以簽書同簽之職

自周以上天子六卿即為六軍之將至秦秋之末田氏專齊始分將相之任至秦始皇拜天下始置衛尉以掌禁兵置中尉以掌京兵置校尉以掌遣兵置衛卒以掌東宮兵置郡尉縣尉以掌郡縣兵置大尉以統諸尉者本晉武公所設佐將撫軍之官

猶後世督護鎮撫也將即當時之列卿也於國政無不統尉則職專撫軍爾至秦遂以太尉與丞相御史為三公位為上將矣自田齊始制將軍監軍於是七國並有之然無常員也漢武帝始置大將軍位冠三公前後左右將軍位並列卿始有常員矣光武以後太尉雖掌武事不復典兵魏文帝始稱太將為都督後周又稱總管唐太宗置經畧使招討使係行軍將衙不常置也睿宗始以節度使典方鎮兵玄宗以宰相領節度不之鎮則置留後代衛兵

自蕭何鎮關中卽留守之職而無其銜至隋煬帝始置留守官宋太祖始置四廂都指揮卽今五城兵馬也

軒轅始置二伯九牧卽今布政也殷湯始令王朝大夫爲監於方伯之國卽今監察御史也漢文帝初置部刺史卽今按察使也後魏始制安撫使唐德宗始置宣撫使宣宗始置制置使並卽今巡撫大臣之稱憲宗始置宣慰使與安撫宣撫並無常員有事則置也睿宗始置節度使卽今都指揮也玄宗始置轉運使

魏文侯已置郡守秦始皇因加郡丞郡丞卽今同知宋太祖始加判推

秦孝公始置縣尹令丞令卽周時邑宰之稱秦始皇加縣尉漢光武加主簿唐宣宗始稱令爲知縣知縣與知州並唐時權任之稱至宋遂以爲守令之正銜矣

秦始皇始置里三老亭長嗇夫游徼三老卽今里老亭長卽今里長嗇夫卽今糧長游徼卽今火夫總甲

成周已有寺人秦始皇初立中車府置令以總群閹

魏文帝更中車府為殿中監北齊高洋置典御郎
隋之奉御今長隨也隋煬帝改殿中監為內侍省
以監為太監加置少監監丞

秦始皇初置給事給事殿廷又置徵事給事相府漢
武帝初置從事給事司隸刺史之署魏文帝始於
中書置通事亦給事之職也晉改從事為錄事後
魏宇文泰始於尚書司置主事亦從事之職也隋
文帝更於尚書置都事乃總吏之職煬帝又改大
理平為評事元於按察置僉事猶從事也其銜則
因宋有僉署樞密院事而稱也 國朝於通政等

衙門各置知事亦從事之任其銜則因唐有知政
事而稱也又於留守等司置斷事亦從事之任其
銜則因元有斷事官而稱也

學士本祕書之職唐太宗始置諸殿及春坊學士朱
全忠始置樞密學士宋真宗始置諸閣學士

七國時始有博士官漢武帝初置五經博士魏文帝
初置太常博士晉武帝初置大理博士後魏孝武
初置醫學博士唐太宗初置太卜司天博士宋神
宗又制武學博士

周公始制內史掌出納王命卽漢中書令職也秦始

皇乃改爲京守銜漢景帝又改爲王國守銜隋文帝始復以爲中書令銜

漢景帝置司直爲丞相府屬後魏莊帝改爲大理屬唐又以爲左右春坊屬

齊莊王始封婦人以食邑漢武帝始封婦人爲郡君縣君王莽始加婦人夫人號宋文帝始封婦人爲國夫人唐太宗始賜五品以上官母皆稱太君

秦孝公始封衛鞅爲商君此男子初封君也漢武帝初封太后母臧兒爲平原君此婦人初稱君也

軒轅始立四妃一妻三妾以應天文后妃四星於是

妻妾之制始定周公始定六宮設夫人嬪世婦衛

以佐王后唐高祖始列置貴妃淑妃德妃賢妃四

妃然貴妃之置起於宋孝武淑妃之置起於魏明

帝德妃之置起於隋煬帝惟賢妃爲唐私置宋真

宗承唐置設嬪御十九等曰淑儀踵晉武帝制設

之曰淑容踵魏明帝制設之曰順儀曰順容並踵

隋煬帝制設之曰婉儀踵北齊高洋制設之曰婉

容爲宋新制曰昭儀踵漢元帝制設之曰昭容踵

武帝制設之曰昭媛踵唐太宗制設之曰脩儀亦

踵魏明帝制設之曰脩容踵魏文帝制設之曰脩

媛亦踵高洋制設之曰充儀亦踵隋煬帝制設之
曰充容亦踵漢武帝制設之曰充媛踵唐高祖制
設之曰婕妤亦踵漢武帝制設之曰貴人踵漢光
武制設之曰美人踵漢高祖制設之曰才人踵漢
宣帝制設之

資原第七 凡四條

上柱國柱國之官稱始於楚懷王至隋文帝則以爲
勳階護軍都尉之官稱始於秦始皇至唐太宗則
以上護軍護軍並爲勳階輕車都尉騎都尉之官
稱始於漢武帝至唐則以上輕車輕車上騎都尉

騎都尉並爲勳階唐又因隋制置驍飛雲武四騎
尉爲階勳自上柱國至武騎尉凡十二轉今之武
階加贈美稱悉遵之文階則惟正從一品尚稱上
柱國柱國餘正二品始定制稱正治上卿從二品
稱正治卿正三品稱資治尹從三品稱資治少尹
正四品稱贊治尹從四品稱贊治少尹正五品稱
脩正庶尹從五品稱協正庶尹然尚以爲加贈未
得實授也

開府儀府三司之官稱起於魏文帝至後周以爲文
散階唐高祖定爲從一品特進之官稱起於漢成

帝至隋以爲文散階唐定爲正二品光祿大夫之
官稱起於漢武帝至後周以爲文散階唐定爲從
二品金紫光祿大夫銀青光祿大夫之官稱並起
於魏文帝至後周以爲文散階唐定爲正從三品
正議大夫通議大夫並隋所置文散階唐定爲正
四品太中大夫中大夫之官稱起於戰國唐以爲
從四品文散階中散大夫之官稱起於王莽至隋
與朝議大夫俱爲文散階唐定爲正五品朝請大
夫朝散大夫亦並隋所置文散階唐定爲從五品
朝議郎承議郎並唐制正六品文散階宋改朝議

爲朝奉奉議郎通直郎亦並隋所置文散階唐定
爲從六品朝請郎宣德郎亦並隋所置文散階唐
定爲正七品朝散郎從義郎亦並隋所置文散階
唐定爲從七品給事郎徵事郎之官稱起於秦始
皇至隋以爲文散階唐定爲正八品承奉郎承事
郎亦並隋所置文散階唐定爲從八品儒林郎登
仕郎亦並唐置正九品文散階文林郎將仕郎亦
並唐置從九品文散階

國朝文資四十六階第一階特進光祿大夫上柱國
是正一品加贈資凡加贈資不實授特進光祿大

夫並漢官名柱國楚官名今並稱之第二階特進
光祿大夫是正一品陞授資第三階特進榮光大
夫是正一品初授資榮祿因元舊資銜第四階光
祿大夫柱國是從一品加贈資第五階光祿大夫
是從一品陞授資第六階榮祿大夫是從一品初
授資第七階資德大夫正治上卿是正二品加贈
資第八階資政大夫是正二品陞授資第九階資
善大夫是正二品初授資資德資政資善三銜並
因元舊制惟正治上卿爲新設第十階正奉大夫
正治卿是從二品加贈資十一階通奉大夫是從

二品陞授資十二階中奉大夫是從二品初授資
正奉通奉中奉三銜並因宋舊制惟正治卿爲新
設十三階正議大夫資治尹是正三品加贈資十
四階通議大夫是正三品陞授資十五階嘉議大
夫是正三品初授資正議通議二銜並因隋舊嘉
議則因元制惟資治尹爲新設十六階大中大夫
資治少尹是從三品加贈資十七階中大夫是從
三品陞授資十八階亞中大夫是從三品初授資
大中大夫資銜並因唐制亞中大夫則因元舊資
銜惟資治少尹爲新設十九階中議大夫贊治尹

是正四品加贈資二十階中憲大夫是正四品陞
授資二十一階中順大夫是正四品初授資中議
中憲中順資銜並因元舊制惟贊治尹爲新設二
十二階朝請大夫贊治少尹是從四品加贈資二
十三階朝議大夫是從四品陞授資二十四階朝
列大夫是從四品初授資朝請朝議資銜並因隋
舊朝列則因元舊資銜惟贊治少尹爲新設二十
五階奉政大夫脩正庶尹是正五品加贈資二十
六階奉政大夫是正五品陞授資二十七階奉議
大夫是正五品初授資奉政奉議資銜並因元舊

制惟脩正庶尹爲新設二十八階奉直大夫協正
庶尹是從五品加贈資二十九階奉直大夫是從
五品陞授資三十階奉訓大夫是從五品初授資
奉直因宋舊資銜奉訓因元舊資銜惟協政庶尹
爲新設三十一階承德郎是正六品陞授資因元
舊制三十二階承直郎是正六品初授資因宋舊
銜三十三階儒林郎是從六品陞授資因唐舊銜
三十四階承務郎是從六品初授資因宋舊銜三
十五階文林郎是正七品陞授資因唐舊銜三十
六階承事郎是正七品初授資因隋舊制三十七

階徵事郎是正七品初授資因隋舊銜三十七階
徵仕郎是從七品陞授資改隋徵事之銜作徵仕
郎也三十八階從仕郎是從七品初授資亦改隋
從事之銜爲從仕也三十九階脩職郎是正八品
陞授資四十階迪功郎是正八品初授資並因宋
舊銜四十一階脩職佐郎是從八品陞授資四十
二階迪功佐郎是從八品初授資並係新設四十
三階登仕郎是正九品陞授資四十四階將仕郎
是正九品初授資並因唐舊銜四十五階登仕佐
郎是從九品陞授資四十六階將佐仕郎是從九

品初授資並因元舊銜

國朝武資凡四十四銜正從一品六階銜並同文資
第七階龍虎將軍上護軍是正二品加贈資龍虎
本五代朱温將領之稱至元以爲勳階護軍資銜
則唐制也第八階金吾將軍是正三品陞授資金
吾漢官名卽秦中尉也至元遂以爲勳階第九階
驃騎將軍是正二品初授資驃騎本漢武帝所置
官名至唐以爲勳階第十階奉國將軍護軍是從
二品加贈資奉國元舊資也十一階定國將軍是
從二品陞授資銜係新設十二階鎮國將軍是從

二品初授資十三階昭武將軍上輕車都尉是正
三品加贈資十四階昭毅將軍是正三品陸授資
十五階昭勇將軍是正三品初授資九鎮國昭武
昭毅昭勇並係元舊惟將軍獨因唐制爾十六階
安遠將軍輕車都尉是從三品加贈資安遠元舊
資改唐寧遠而置也十七階定遠將軍是從三品
陸授資因唐舊銜十八階懷遠將軍是從三品初
授資因元舊銜十九階廣威將軍上騎都尉是正
四品加贈資廣威係元資騎尉乃唐階也二十階
宣威將軍是正四品陸授資二十一階明威將軍

是正四品初授資宣威明威並唐舊資二十二階
信武將軍騎都尉是從四品加贈資二十三階顯
武將軍是從四品陸授資二十四階宣武將軍是
從四品初授資二十五階武節將軍驍騎尉是正
五品加贈資二十六階武節將軍是正五品陸授
資二十七階武德將軍是正五品初授資二十八
階武毅將軍飛騎尉是從五品加贈資二十九階
武毅將軍是從五品陸授資三十階武畧將軍是
從五品初授資三十一階承信校尉雲騎尉是正
六品加贈資三十二階承信校尉是正大品陸授

資二十三階昭信校尉是正六品初授資三十四階忠武校尉武騎尉是從六品加贈資三十五階忠武校尉是從六品陞授資三十六階忠顯校尉是從六品初授資三十七階忠勇校尉是從六品陞授資三十八階忠翊校尉是正七品初授資三十九階脩武校尉是從七品陞授資四十階敦武校尉是從七品初授資四十一階保義校尉是正八品初授八品陞授資四十二階進義校尉是正八品初授資四十三階保義副尉是從八品陞授資四十四階進義副尉是從八品初授資自信武將軍以下

至進義副尉凡二十三階資銜並因元制惟加資則皆遵唐十二轉之舊稱焉

刑原第八 九四條

軒轅始爲刑辟制流笞杖斬四罪唐堯始制墨劓剕刑刑宮五刑舜造赦贖紂作桎梏及烹醢轘高炮烙之刑周公置徒絞設八議漢文帝始除肉刑隋裴政始定笞杖徒流死五刑唐太宗始置加役流皋陶始制律范巧始作刑書唐高宗始作律疏秦商鞅始立隣里相收司連坐律漢張湯始立吏傅相監司律

皋陶始作獄唐李乾祐始置御史臺獄

文原第九 九十四條

伏犧始造字畫詩文爲蚪斗字周史籀乃作大篆秦
李斯作小篆程邈作楷字漢史游作草字蔡邕作
八分隸白劉德升作行書元僧八思巴作蒙古字
伏犧初以木刻字軒轅易以刀書虞舜造筆以漆書
于方簡刑夷作墨史籀始墨書于帛仲由作硯蔡
倫作紙

舜作羊毛筆秦蒙恬作兔毛筆王羲之作鼠鬚筆
邢夷作松烟墨奚廷圭作油烟墨

蔡倫始製繭麻二紙張華作落紙王羲之制穀藤二
皮之紙唐王嶼以竹及草爲紙

軒轅始鑄文彝鼎周宣王始刻文于石五代和凝始
以梨板刊書

伏犧始作契操爲長短句詩軒轅作銘箴岐伯始作
鼓吹凱歌帝嚳始作頌舜始作四言詩夏啟始作
檄商湯始作誥伊尹始作訓周公始作冊命榜文
祝文哀誄墓誌冠辭周宣王始作碑南仲始作露
布卜商始作序子思始作記莊子始作說屈原始
作騷宋玉始作賦及七言詩田駢始作辨荀卿始

作論解秦始皇始作詔制李斯始作章奏議表漢
唐山夫人始作三言詩文帝始作敕及策問賈誼
始作策枚乘始作五言詩武帝始為樂府聯句淮
南王安始作令嚴助始作封事司馬相如始作喻
贊東方朔始作傳谷永始作六言詩揚雄始作連
珠志錄班固始作行狀及牋趙岐始作題跋曹植
始作絕句曹髦始作九言詩晉陸機始作對偶文
詞隋煬帝始為倚聲命辭唐沈佺期始作律詩元
稹始作次韻

皋陶始為書簡唐李吉甫始加題緘

蘇秦始為刺謁唐李德裕始置門狀卽門單也

伏犧始作史書文王始作經書老聃始作子書子思
始作傳書公羊高始作註書李斯始作字書漢劉
歆始作類書梁沈約始作韻書晉李充始分書為

四部

顓頊始作曆書呂望始作兵書周公始作禮書樂書
政書呂公始作相書晉郭璞始作風水書漢甘公
始作五星命書唐徐子平始作八字命書

周公制左右史左史為尚書右史為春秋魯隱公始
制私史漢司馬遷始為紀傳武帝始為起居注梁

周興嗣始為實錄唐姚鑄始撰時故紀

卜書原於八索地志原於九丘詩文集原於詩書二經

晉僧了義始作切字訣沈約始辨四聲作詩粘律

食原第十九十條

太古茹毛而飲血有巢始教民食果遂人始作火制
截以炮神農始耕作炒米軒轅造粥飯羨炙膾公
劉作糝糕麻團周公造湯團魯敬姜作不托汝頽
作粽秦昭王作烝餅漢高祖作漢餅金日磾作胡
餅劉安作苽瀋諸葛亮作饅頭夾饊石崇造餛飩

梁武帝造麵筋

軒轅臣夙沙作鹽螺祖作醢公劉作飭蜜殷果作醋

周公作醬芥辣孫權始效文趾作蔗糖

太古飲水軒轅作炒米湯成湯制茶唐陸羽始辨茶
品

遂人作酪軒轅作醴儀狄作酒周公作酎

遂人作脯始為乾物軒轅作菹始為淹物少昊為藿

禹制淮白二鯨殷湯作醢吳壽夢作鮓秦苦李作

豉糟醬諸物則周末制也

伏羲始圈養六畜軒轅乃圍養鳥獸池養魚鼈夏禹

始養馬以廐櫪

遂人作釣伏犧作罟神農作罾白軒轅作九罟禹作魚梁蟹筍伊尹作魚罩扈箚

伏犧作獵網畢羅軒轅作獲戈陷穽

神農始種五穀軒轅始種桑麻蔬菓草木漢張騫始移植大宛油麻大蒜大夏芫荽苜蓿蒲萄安石石榴西羌胡桃於中國唐太宗始移植占城早稻康國金桃波稜菜於中國五代胡峯始移種回鶻西瓜於中國

神農始作鋤犁春甫后稷作鑿耨禹作山錐叔均作

紗紩

衣原第十一九十一條

有巢始衣皮軒轅妃嫫祖始育蠶緝麻以興機杼而成布帛唐堯加以絺苧木綿草布毛縵虞舜加以錦繡秦始皇作夾纈

伏犧作裘軒轅臣胡曹作衣伯余爲裳因染采以表貴賤舜始制衮及黻深衣禹作襦袴伊尹作夾襖傅說作袍唐高祖作半臂馬周作襪衫宋太祖始學製南蕃海青截裙

軒轅始定服色凡人君所尚服色各依五運更之色

周公始制天子服四時各以其色隋文帝始制天子服專尚黃唐韋鞞始請天子用器皆以黃色
伊尹始制婦人大袖秦始皇制霞帔二世作背子隋
煬帝作長裙楊貴妃作抹背

遂人作繩軒轅因作綿索

遂人始以繩束髮為髻伏犧始作皮冠軒轅加以冕
旒充纁堯加繡纓周公作幅巾魯昭公始以絹素
為弁趙氏武靈王作貂蟬秦孝公作武幘漢高祖
作竹皮冠王莽制頭巾後漢始效北蕃制氍帽周
武帝作幘頭唐太宗作紗帽其後始效南蕃制馬

尾帽

周公作縵宋太祖易以網巾

嫫母作特髻漢呂后作婦冠

女媧作竹簪堯作銅簪舜作象牙簪玳瑁釵桀作金
玉釧紂作翠翹金鈿步搖寶幹指環呂后制五采
通草花晉郭槐始剪綵為花

軒轅臣於則作履制襪周公造屨屨屨為晉文公造
屐趙武靈王始效北蕃造靴

軒轅始作帶顛項制條堯為玉珮殷湯作笏及鞶囊
唐高祖始置金銀魚袋張九齡作笏袋

室原第十二 凡四條

有巢始爲巢穴遂人作臺伏犧始制屋廬神農加以
戶庭堂倉廩庫窖軒轅始備宮室樓榭觀閣門廊
階墀之制禹作橋文王作浮橋周公作邸館亭子
及柱礎魯般又飾門扇以鋪首秦孝公作殿棟以
鴟尾宣帝始制齋軒

神農作戶牖軒轅作門窓周公作轅門戟門旌門
伏犧始以茨覆屋禹作土墜石甃築臣昆吾作甃瓦
伏犧作籬軒轅作欄舜作墻禹作柵伊尹作柱榱周
公作壁

地原第十三 凡六條

伏犧臣粟陸始濬川神農作井軒轅始開山通道舜
園囿圃池溝澮臺駘始爲堤伯益作閘

神農始置里數軒轅始畫野分州禹始爲封埃周公
設置郵

神農始教民種田軒轅始立步制畝爲井田經界禹
立溝塗封植以行貢法商湯行助法周武王置籍
田以親耕周公制徹法秦商鞅始廢井田開阡陌
民田始得買賣而行魯宣公稅畝法唐楊炎始制
兩稅

周公始築洛陽城商鞅始築咸陽城伍員始築蘇州
城范蠡始築越州城蕭何始築長安城孫權始築
建康城王審知始築福州城錢鏐始築杭州城
吳夫差鑿邗溝秦始皇始開秦淮漢張渤始開廣德
溪馬臻始置鏡湖晉孔愉始作紹興運河宋陳承
昭始浚汴梁金水五丈二河郭原明始置湘湖堤
王逵始鑿王公池

秦司馬錯始開巴蜀地秦昭王始開義渠地趙氏靈
王始開代樓煩地燕惠王始開遼東地秦始皇始
開朔方地漢彭吳始開穢貊地唐蒙始開邛夔夜

郎牂牁越雋地嚴助始開東甌兩越地衛青始開
陰山地趙破奴始開玉關地元世祖始開雲南地

兵原第十四 九六條

伏羲之臣共工始爲步戰及水攻神農因造干戈及
戟矛斧蚩尤益以刀劍而用馬戰及大攻軒轅始
征四方制八陣法及京觀又爲甲冑雲梯樓櫓黃
鉞車戰之具鉦鐃鞞角之號三苗始爲伏兵禹制
抹額呂望始爲船戰專諸始造匕首孫武造鐵蒺
藜漢匈奴作鶻箭諸葛亮造竹槍宋李定造神臂
弓董惇效洞蠻制標牌

軒轅始以兵師為營衛置虎賁即今鎮殿將軍力士之屬也商盤庚始設兵戍立烽燧秦始皇始制漕運漢武帝始立屯田唐張說始立長征軍開濟始令軍丁食補

軒轅始制五色旗畫以鷹隼指頤向背夏禹始建旗旌旂旒以別尊卑等級周公始備九旗

軒轅作柝趙武靈王作刁斗

軒轅作砲呂望作銃魏馬鈞制爆杖隋煬帝益以火藥雜戲几遽作砲

軒轅因造弓矢弩的舜造弓袋矢筒殷臣薛侯制投

壺

技原第十五 九十二條

神農始究息脉辨藥性制針灸作醫方軒轅臣巫彭始制藥丸伊尹創前藥秦和始為醫書

軒轅始為導引老聃始為脩煉漢魏伯陽始為丹經軒轅臣隸首作九數筭法胲作五御揮作六射倮作規矩準繩尺度權衡斗斛

軒轅始醫獸少昊始闡潔六畜古公亶父始接菓木晉王愷始接花卉舜臣董父始能馴熊周梁鸞始能馴虎馴獅馴象則本羌越技也

禹始辨夷音伯益始辨鳥獸語

伯益始相獸周史佚始相人

軒轅始制厭禳法漢武帝始用南越禁咒方京房始制娶嫁撒帳此厭禳法也

周穆王始好西域語諸幻術謂如後世所有請雨致雪步虛縮地移沙役兒入火出神隱身蒙體花身燒丹臭柑買瓜指花百物之法也

漢武帝始效制西域眩人之戲卽今吞刀履火種瓜植樹屠人戮馬之法

唐虞時已有童謠成周始有識記若定鼎卜世之說

也

周穆王初置道觀漢張陵初造符籙魏太武始號寇謙之爲天師梁武帝始謚陶弘景爲貞白先生隋文帝始置道官

漢明帝初置僧寺吳孫權始造佛塔晉何充初置老寺石勒始稱佛圖澄爲大和尚劉裕始給僧牒置戒壇高洋始令僧衣褐隋文帝始置僧官唐玄宗始著僧冊宋太祖始令僧尼異壇受戒

堊原第十六 凡四條

几蘧藁昇而風化有巢始以藁裡掩之遂人積薪以

葬軒轅始制棺夏禹加土聖成湯加木槨周公制
墻妻桓魋為石槨

夏禹始制明器芻靈商湯設含巫咸始造開路神周
武王置窆碑隧道備機衣襚穆王加以殉室秦武
公始以人殉唐王嶼始造紙錢今之糧壘含類也
明衣面帛襚類也

商湯始造明旌伊尹始造墓宮周公始為華表周宣
王始置石鼓石人猊虎羊馬秦始皇始作墳屋晉
武帝始置神道碑

周公始合葬挽訶起於周公之中葉

器原第十七九二十九條

遂人作火神農因制陶冶軒轅作針剪少昊制灰汁
米糊顓頊作衣衿后稷制砧杵后夔作衣架紂作
熨斗

遂人作火神農作油軒轅作燈唐堯作燈檠成湯作
蠟燭

遂人作樵祝融作炭唐堯作火爐伊尹作踏脚周公
作火櫃史秩作火欵秦始皇為烘節晉羊琇作獸
炭

舜作香爐漢丁緩為香毬

軒轅作膠舜作漆公劉作黃蠟桀臣昆吾作石灰紂
作脂粉周公作礪火秦穆公作輕粉劉安作焔焔
白蠟

顓頊始藏冰舜始造扇丁緩作風輪

遂人以匏濟水伏犧始乘桴軒轅作舟楫顓頊作篙
桀帝譽作柁櫂堯作維牽夏禹作舵加以蓬破帆
檣伍員作樓船

軒轅作梯蜀五丁為棧秦樗里子作甬道梁惠施作
跳板李斯作閣道

伏犧始乘牛馬而制羈縻鞭杖軒轅作輓輅少昊制

牛車奚仲制馬車而造鞍的勒勒駕六馬建旂旌

旂旒以別尊卑等級夏禹制輦周公制進賢四望

二車秦始皇作轎漢高祖作竹兜漢武帝作羊車

芝車宋陶穀制大輦小輿真宗始置大安輦

神農作杵曰軒轅臣雍父作碓后稷作水碓魯般作

礮磨碾子晉杜預作連機碓踏碓是也

神農作斧軒轅作鋸鑿般作鉋鑕櫟括

神農作床席薦蓐枕被少昊作簣堯作毯伊尹制承

塵周公作簟

軒轅作帷帳禹作屏伊尹作亮隔周公作簾

伏犧作木梳神農作篋籠軒轅作鏡鑷剃刀少康作
掠子伊尹作油刷呂望作梳匣秦始皇作鏡臺
軒轅作幌巾帝嚳作布袂湯作手巾脚巾祖甲作帑
周公作紗罩軒轅作几夏禹作案周公制筵姑呂
望作榻召公作椅漢武帝始效比蕃作交椅曹操
作懶架

軒轅作箱簾后稷作囊橐少康作羅籃笏節
神農作耒柱作筵箕少康作箕箒周公作簪洗
伏犧作庖神農作厨軒轅作竈
神農作甌甕軒轅作釜甑鼎樽盤盂椀櫟匙筋祝融

作鑿鑿舜作俎豆敦勺禹作籩豆盂湯作盃周公
作臺盞田恒作唾壺秦始皇制湯確唐李絳制注
子仇士良造偏提崔寧女造梳托

薦敖作酒竿老聃作酒筓

軒轅始以律管候氣顓頊始以土炭候氣

軒轅始造記里鼓指南車周公作欵器諸葛亮作木
牛流馬晉石扇始置木鳳啣赦

軒轅始造刻漏周公始分更點

軒轅始作浴盆溺器高辛氏造為偃厠

柱作簦笠禹始為蓋魏神元帝始為傘宇文涉歸作

擅衫雨籠公劉作泥甬岸斗伊尹始作桔槔史佚
始作輾轡馬鈞始造籜桶

軒轅臣伯陵始造錢刀夏禹始用龜貝銀玉之貨

軒轅臣伯陵始以布帛為楮幣漢武帝改制皮幣唐

憲宗始置關子時呼為飛錢宋孝宗改制會子元

世祖始造交鈔

軒轅造錢而無文周景公改鑄大錢始為有文公孫

述始鑄鐵錢魏孝武始以年號鑄錢

秦始皇始禁私錢漢武帝始拘銅于官而禁私采珠

玉金銀銅鐵錫商武乙作木俑周偃師作桃梗土

偶越勾踐始作金人唐高昇始作嘉陵石佛

事原第十八 九六條

神農始別五木以改火軒轅始書雲物成湯始作土

龍巫咸始制驅儼周公始制立春土牛土已流觴

齊景公始為登高及競渡

秦始皇始上墳漢武帝始張上巳燈越巫始制端午

綵符犍線艾人唐太宗始置端午遺扇王昌遇始

制重陽藥市

立春青幡月令哉青旗遺制也歲旦桃符周公招梗

遺制也臘日賽神禮記八蜡遺制也元日拜年冬

至賀冬古人班朔遺制也清明禁烟神農改火遺制也除夕爆竹周人庭燎遺制也

夏桀始設侏優倡戲周偃師始造傀儡宣王始養鬪鷄楚熊渠造弄丸勾踐始為弄潮無終嘉父作千秋毬踰秦武王作角觝始皇作曼延魚龍水戲漢武帝益以幻眼走索尋撞舞輪弄椀影戲唐玄宗制舞馬舞象之戲

桀臣烏曹作賭博圍棋季咸造胡面子韓信作紙鷂漢武帝作猜拳鬪草劉向作彈棋周武帝作象棋唐明崇儼作買鬼宋江作差牌還無作謎語盧敖

作市語晉梵僧了義作翻語

周公始立稗官戰國時始有小說書趙宋時始有傳奇曲本及逃臣小唱

物原終



物原跋後

夫物必有原也欲知其原非博極群
書不能也中州之士恒苦乎書籍之
未備而况窮鄉下邑者乎一日

兵憲冲谷陳老先生出物原一帙以
示餘請袖歸展讀一過則見夫天地
山川兵刑服食與夫一事一物一技

之微無不考求其創始之自可謂博
而約矣遂命工鋟梓以廣其傳使夫
人欲知其原者不俟旁搜博采一寓
目之間居然可知信有裨於人人也
是爲跋

嘉靖乙巳菊日吉旦知銅仁府事前
北京戶部貴州清吏司郎中南海晁

溪李憲書



古今圖書集成

上海圖書館藏



